



Broj 5 – IX - X 2011.

**CENTRALNA BANKA
BOSNE I HERCEGOVINE**



**ЦЕНТРАЛНА БАНКА
БОСНЕ И ХЕРЦЕГОВИНЕ**

Poštovane kolegice i kolege,

Uspješan završetak svakog projekta predstavlja zadovoljstvo, pa tako je i Centralna banka Bosne i Hercegovine (CBBiH) sa zadovoljstvom objavila završetak 18-mjesečnog programa tehničke saradnje s Evropskom centralnom bankom (ECB) koji je finansirala Evropska unija (EU). Projekat je doveo CBBiH još jedan korak bliže evropskim standardima i praksama, ali je pred institucijom još puno posla u procesu usvajanja EU standarda. Možda najslikovitiju ocjenu programa dao je Jurgis Vilcinskis, šef Odjela za evropske i ekonomske integracije u Delegaciji EU u BiH kazavši da je «govoreći jezikom ljudi iz centralnih banaka, ovaj projekt zaslužio rejting AAA».

Jedan od najvažnijih guvernera današnjice, guverner Narodne banke Kine Zhou Xiaochuan posjetio je CBBiH, a uposleni su imali zadovoljstvo slušati i njegovu prezentaciju o finansijskoj saradnji između Kine i drugih ekonomija u tranziciji.

Važan pomena u ovom izdanju je i zaključak Predsjedništva BiH kojim se podržava nastavak provedbe zakonom uspostavljenog modela monetarne politike u BiH. Ovaj model, kako je ocijenilo Predsjedništvo BiH tokom konsultacija sa članovima Upravnog vijeća CBBiH i Uprave, osigurao je makroekonomsku stabilnost, konvertibilnost domaće valute, relativno nisku inflaciju i ekonomski rast.

U rad je puštena prva web stranica posvećena finansijskoj pismenosti, što je podržao i guverner CBBiH, koji je istakao da ovakve inicijative omogućavaju građanima BiH sigurnije i odgovornije uživanje u uslugama finansijskog posredovanja.

Predstavnici CBBiH učestvovali su i u radu šeste Međunarodne konferencije Sarajevske berze, te Internacionalne korisničke grupe sistema za prerađu novčanica.

Posjetom osnovaca našoj instituciji, i ove godine smo obilježili Svjetski dan štednje.

Služba za odnose sa javnošću

U ovom broju:

- **ECB I CBBiH USPJEŠNO ZAVRŠILE PROGRAM SARADNJE**
- **GUVERNER NARODNE BANKE KINE BORAVIO U POSJETI CBBiH**
- **PREDSJEDNIŠTVO BiH PODRŽALO DALJNJE PROVOĐENJE USPOSTAVLJENOG MODELA MONETARNE POLITIKE**
- **CBBiH ČLANICA INTERNACIONALNE KORISNIČKE GRUPE SISTEMA ZA PRERADU NOVČANICA**
- **OBILJEŽEN SVJETSKI DAN ŠTEDNJE**



Centralna banka Bosne i Hercegovine je certificirana za ISO 27001:2005 standard, što potvrđuje ispravnu implementaciju ISMS-a za obim definisan na zvaničnom certifikatu sa brojem 44 121 091033 koji je Centralnoj banci Bosne i Hercegovine dodijelila certifikatorska kuća TÜV NORD CERT GmbH.

Izdavač: Centralna banka Bosne i Hercegovine;

Adresa: Maršala Tita 25, 71000 Sarajevo

Uređivački kolegij: dr Radomir Božić, viceguverner, mr Ankica Kolobarić, viceguverner, Feriha Imamović, viceguverner, Zijada Kovač, koordinator Službe za odnose sa javnošću

Priprema: Služba za odnose sa javnošću

Prevod tekstova na engleski jezik: Služba za odnose sa javnošću

Lektura (jezici bh. naroda i engleski jezik): Služba za prevodilačke i lektorske poslove

Web stranica: <http://www.cbbh.ba>; E-mail: pr@cbbh.ba; kontakt telefon: (033) 278 128; (033) 278 146; (033) 278 123

ECB I CBBiH USPJEŠNO ZAVRŠILE PROGRAM SARADNJE



Evropska centralna banka (ECB) i Centralna banka Bosne i Hercegovine (CBBiH) uspješno su 30. septembra 2011. godine završile 18-mjesečni program tehničke saradnje. Program je započeo 1. aprila 2010. godine, finansirala ga je Evropska unija (EU) kroz Instrument programa za pretprijetnu pomoć (IPA) s jednim milionom EUR, a proveo ECB u saradnji sa sedam centralnih banaka: Austrije, Grčke, Holandije, Italije, Njemačke, Slovenije i Španije. Eksperti centralnih banaka Bugarske i Rumunije također su učestvovali u ovom programu.

Završetak programa je važan korak naprijed u naporima CBBiH u pridruživanju Evropskom sistemu centralnih banaka (ESCB) nakon ulaska BiH u EU. Kao rezultat ovog programa, CBBiH je u mogućnosti pružanja još boljih usluga javnosti. Ovaj program doprinosi provođenju zdrave monetarne politike i politike finansijske stabilnosti, u korist stanovništva BiH.

Projektom su bile obuhvaćene sljedeće oblasti: statistika, ekonomsko modeliranje, finansijska stabilnost, harmonizacija legislative sa EU, koordinacija procesa evropskih integracija i informaciona tehnologija, ali ključni rezultat projekta, kroz sinergije ostvarene na nivou čitave banke, je jačanje cjelokupnih institucionalnih i ljudskih kapaciteta CBBiH u cilju pravovremenog uvođenja evropskih standarda centralnog bankarstva u naše poslovanje.

Na ceremoniji i konferenciji za novinare upriličenim povodom završetka projekta, guverner CBBiH dr Kemal Kozarić istakao je kako smatra da će glavni efekti programa biti vidljivi kroz novi statistički sistem kamatnih stopa, osoblje obučeno za korištenje modela kratkoročnog prognoziranja, te u formulisanju mape puta CBBiH u eurointegracije.

Rezultat ovog programa je i usklađivanje Zakona o CBBiH sa standardima centralnih banaka EU. S tim u vezi uspostavljen je okvir za analizu finansijske stabilnosti s fokusom na trendove i rizike.

«Evidentno je da nas je projekat doveo još jedan korak bliže evropskim standardima i praksama, ali i da je pred nama još puno posla u procesu usvajanja EU standarda. Smatram da je ključni faktor uspjeha ovog projekta izuzetno profesionalan pristup, direktna i otvorena komunikacija svih uključenih strana, ali i vrlo visok nivo vlasništva CBBiH nad svim fazama projekta», rekao je guverner Kozarić.

Gilles Noblet, zamjenik generalnog direktora Direkcije za međunarodne i evropske odnose ECB-a, rekao je da je program tehničke pomoći te banke doprinio ukupnom jačanju bh. institucija. Istakao je kako su snažne institucije i dobro upravljanje njima od suštinskog značaja za BiH i EU.

«Vlade i centralne banke, svaka u svome domenu, moraju osigurati provođenje zdrave fiskalne i monetarne politike. To je najbolji doprinos koji možemo dati ekonomskom rastu, ali i građanima u našim zemljama», kazao je Noblet.

Jurgis Vilcinskis, šef Odjela za evropske i ekonomske integracije u Delegaciji EU u BiH istakao je da je ovim projektom novac poreznih obveznika EU investiran u monetarnu i finansijsku stabilnost BiH, te u napore da se one usklade s evropskim standardima.

«Govoreći jezikom ljudi iz centralnih banaka, rekao bih da je ovaj projekt zaslužio rejting AAA», rekao je Vilcinskis, te dodao da je prihvatanje evropskih standarda ključno za CBBiH dok se priprema za pridruženje Evropskom sistemu centralnih banaka, a što će se desiti kada BiH osigura članstvo u EU. Glavni cilj ovoga projekta jeste integracija u Eurosystem. To će pridonijeti širenju finansijskog tržišta u BiH i time osigurati ekonomski rast i kreiranje radnih mjesta.

«Kao zemlja u tranziciji i potencijalni kandidat, BiH treba iskoristiti dobru praksu i uspješne priče iz EU i nastaviti strukturne reforme kako bi povećala ekonomski potencijal u energetici, poljoprivredi, predradivačkoj industriji i izvozu, te otkloniti prepreke domaćim i stranim investicijama», rekao je Vilcinskis.

Pri tom je dodao da je kapacitet institucija koje provode reforme i makroekonomsku politiku esencijalan i da je u ovom procesu i Delegacija EU spremna ponuditi pomoć CBBiH i bh. vlastima u ovoj oblasti.

Zijada Kovač, koordinator Službe za odnose s javnošću



GUVERNER NARODNE BANKE KINE BORAVIO U POSJETI CBBiH



Centralnu banku Bosne i Hercegovine (CBBiH), 15. septembra 2011. godine, posjetila je delegacija Narodne banke Kine koju je predvodio guverner Zhou Xiaochuan. S guvernerom kineske Narodne banke, koji se smatra jednim od vodećih centralnih bankara u svijetu, zvaničnici CBBiH razgovarali su o krizi u eurozoni i mogućem uticaju na zemlje u tranziciji, te o mogućoj snažnijoj ekonomskoj saradnji BiH i Kine i njihovih centralnih banaka.

Guverner Narodne banke Kine istakao je kako političari u njegovoj zemlji smatraju da treba podržati euro, Evropsku uniju i programe fiskalne konsolidacije.

«Evropa je jako važna za Kinu, a eurozona je od ključnog značaja za razvoj svijeta i globalne ekonomije», kazao je guverner Xiaochuan, istakavši kako Narodna banka Kine ima jako dobre odnose s Evropskom centralnom bankom (ECB) i ministrima finansija zemalja eurozone.

Guverner CBBiH dr Kemal Kozarić kazao je kako CBBiH nema kapacitete da igra tako važnu ulogu kao Narodna banka Kine, te da ohrabruje opredijeljenost Kine da se riješi problem evropskih dugova, s obzirom na činjenicu da je euro projekat u koji je puno uloženo.

«Sigurno je da mi nemamo dovoljno instrumenata da se borimo s krizom eura. Ono što mi možemo da uradimo jeste da pratimo dnevnu likvidnost i dobru kapitalizaciju banaka kako bi se održala finansijska stabilnost», kazao je guverner Kozarić.

Kineski guverner ukazao je na potrebu da se glas malih zemalja čuje i u međunarodnim finansijskim institucijama, a Kina trenutno istražuje mogućnost snažnijeg prisustva u Evropskoj banci za obnovu i razvoj (EBRD) i Evropskoj investicijskoj banci (EIB). Prisustvom u ovim finansijskim institucijama, Kina će ostvariti i veće prisustvo i u ovom regionu, smatra guverner Kozarić.

Kina je zainteresovana i za učešće u infrastrukturnim projektima, a prostora za saradnju ima i u vanjskotrgovinskoj razmjeni, posebno ako se uzme u obzir podatak da je BiH iz Kine uvezla robe u vrijednosti od oko 665 miliona KM, a izvezla u Kinu svega sedam miliona KM. To je, prema ocjeni guvernera Kozarića, veliki debalans, te se stoga želi poslati poruka domaćim i poslovnim ljudima iz Kine da ovaj prostor ima potencijala, naročito u oblasti energetskog sektora, proizvodnje hrane, turizma, poljoprivrede itd.

Što se tiče saradnje monetarnih institucija, Narodna banka Kine ponudila je CBBiH mogućnost tehničke saradnje u vidu edukacije i obuke, a na proljeće je moguća uzvratna posjeta predstavnika CBBiH kolegama u Narodnoj banci Kine.

Za više osoblje CBBiH, guverner Xiaochuan je održao prezentaciju pod nazivom «Finansijska saradnja između Kine i drugih ekonomija u tranziciji».

Zijada Kovač, koordinator Službe za odnose sa javnošću



Delegaciju Narodne banke Kine, s guvernerom Xiaochuanom na čelu, primio je i predsjedavajući Predsjedništva BiH Željko Komšić, a u delegaciji je bio i guverner Kozarić, kao domaćin delegaciji Narodne banke Kine. Predsjedavajući Komšić je, u ime Predsjedništva BiH, iskazao zado-

voljstvo učestalošću susreta BiH i Kine na bilateralnoj osnovi, te istakao kako su ovi susreti, s temama ekonomije i poslovne saradnje, od koristi za BiH. Sgovornici su razgovarali o mogućnostima otvaranja novih vidova saradnje ekonomija i bankarskih sektora BiH i Kine.

PREDSJEDNIŠTVO BiH PODRŽALO DALJE PROVOĐENJE USPOSTAVLJENOG MODELA MONETARNE POLITIKE

Predsjedništvo BiH, na sjednici održanoj 10. oktobra 2011. godine, a u okviru redovnih konsultacija s Upravnim vijećem i Upravom Centralne banke Bosne i Hercegovine (CBBiH), razmatralo je ekonomsku i monetarnu situaciju u eurozoni i njene implikacije na BiH. S tim u vezi, Predsjedništvo BiH donijelo je zaključak kojim podržava dalje provođenje zakonom uspostavljenog modela monetarne politike u BiH.

Taj model je tokom dosadašnjeg perioda primjene u BiH osigurao makroekonomsku stabilnost, konvertibilnost domaće valute, relativno nisku inflaciju i ekonomski rast, saopštilo je Predsjedništvo BiH.

Cijeneći mjere i aktivnosti koje provodi Upravno vijeće CBBiH, Predsjedništvo BiH je ocijenilo da građani i privrednici nemaju razloga za zabrinutost za stabilnost domaće valute.

Viceguverner CBBiH prof. dr. Ra-

domir Božić izjavio je da CBBiH, u koordinaciji s bankarskim agencijama, prati stanje u bankarskom sektoru i moguće implikacije dužničke krize iz eurozone.

On je tokom 6. međunarodne konferencije Sarajevske berze potvrdio da je na redovnom konsultativnom sastanku s Predsjedništvom BiH ocijenjeno da CBBiH treba da nastavi s provođenjem monetarne politike, u skladu sa zakonskim okvirom, jer je to najbolji način za održanje fiskalne i stabilnosti finansijskog sektora, domaće valute, njene konvertibilnosti, kao i povjerenja stanovništva i privrednog sektora.

Također je izrazio uvjerenje da će autoriteti koji imaju mogućnost da utiču na dalji razvoj dužničke krize u EU reagovati na vrijeme i da efekt krize iz eurozone neće biti u onom obimu u kojem bi se mogao očekivati u slučaju izostanka adekvatne reakcije.

Zijada Kovač, koordinator Službe za odnose sa javnošću





GUVERNER KOZARIĆ PUSTIO U RAD WEB STRANICU POSVEĆENU FINANSIJSKOJ PISMENOSTI

Guverner Centralne banke Bosne i Hercegovine (CBBiH) dr Kemal Kozarić zvanično je 19. oktobra 2011. godine pustio u rad prvu web stranicu posvećenu finansijskoj pismenosti.

Web stranicu 'www.MojeFinansije.ba' je finansirala i razvila kompanija Visa kako bi stanovništvu BiH pružila korisne informacije o finansijskoj pismenosti, bez promovisanja vlastitih finansijskih usluga. Stranica sadrži praktične savjete, informacije, linkove i upute, od upravljanja porodičnim budžetom do informacija o studentskim kreditima, te je veoma korisna za one koji žele poboljšati svoje znanje u ovoj oblasti.

Web stranica je kreirana na osnovu istraživanja provedenog u okviru foruma Visa mladi lider o stavovima

o upravljanju vlastitim novcem i finansijama. Istraživanje je pokazalo da 72,7 posto stanovništva BiH želi saznati više o upravljanju novcem. Tako je nastala ideja o pogodnom i pristupačnom izvoru informacija o upravljanju novcem i finansijama za stanovništvo BiH.

Projekat je podržao i guverner Kozarić, koji je kazao da CBBiH podržava razvoj svih oblika finansijskih usluga i aktivnosti, posebno na polju edukacije korisnika usluga.

«S obzirom na to da su usluge finansijskog posredovanja veoma kompleksne, ovakve inicijative omogućavaju građanima BiH sigurnije i odgovornije uživanje u uslugama finansijskog posredovanja», rekao je guverner. On je dodao da je stalna edukacija klijen-

ata, posebno u finansijama, neophodna da bi klijenti znali u kakve obaveze ulaze i šta prihvataju kako kasnije ne bi dolazilo do nesporazuma i u krajnjem slučaju do sudskih sporova.

Nakon zvaničnog puštanja u rad web portala, održana je i panel-diskusija, a učesnici u debati, osim guvernera Kozarića, bili su regionalni menadžer kompanije Visa Biljana Petruševska-Trajkovska i asistent na Ekonomskom fakultetu Univerziteta u Sarajevu (EFSA) Velid Efendić.

Kompanija Visa ima ambiciozan plan kojim programe finansijske pismenosti nastoji podijeliti sa 20 miliona ljudi širom svijeta do 1. maja 2013. godine.

Zijada Kovač, koordinator Službe za odnose sa javnošću

VICEGUVERNER BOŽIĆ ODRŽAO PREZENTACIJU NA 6. MEĐUNARODNOJ KONFERENCIJI SASE



U Sarajevu je 11. listopada 2011. održana 6. Međunarodna konferencija SASE, pod nazivom «Oporavak tržišta kapitala - dugoročni trend ili ...?». U ime Centralne banke Bosne i Hercegovine (CBBiH) konferenciji je nazočio, te održao prezentaciju pod nazivom «Stanje i perspektive finansijskog sektora u Bosni i Hercegovini», viceguverner prof. dr. Radomir Božić.

U prezentaciji, viceguverner Božić je iznio makroekonomske pokazatelje BiH, pokazatelje za bankarski i lizing sektor i mikrokreditne organizacije,

trendove u ovim sektorima, kao i mjere koje je potrebno poduzeti u budućnosti.

Glavnim rizicima za bankarski sektor viceguverner Božić je označio mogućnost prelijevanja krize iz domaćih zemalja inozemnih bankarskih grupacija i EU zone, procikličnost finansijske krize na ostale segmente finansijskog sektora i izloženost u regiji. Posebno važna, kako je naveo, je uspostava efikasnog nadzora i dobra prekogranična suradnja, te uvažavanje i zaštita lokalnih interesa u korporativnom upravljanju u bankama.

S druge strane, cijeli finansijski sektor je pokazao zavidnu razinu otpornosti na finansijsku krizu. Rezultati testova na stres su pokazali da je bankarski sektor dobro kapitaliziran i otporan na šokove, te je primjetan porast štednje kao i blagi rast kreditne aktivnosti.

Kad je riječ o mikrokreditnom sektoru, potrebno je, između ostalog, poboljšati korporativno upravljanje, izmijeniti Zakon o MKO zbog uklanjanja uočenih nedorečenosti, povećati transparentnost poslovanja kroz razmjenu podataka putem CRK, te konsolidirati sektor.

Na razini sektora lizinga, viceguverner Božić je kao neophodno istakao kapitalno jačanje, poboljšanje procedura upravljanja kreditima i rizicima, uspostavljanje sustava internih kontrola, te povećanje transparentnosti poslovanja kroz razmjenu podataka putem CRK.

Na kraju, viceguverner Božić se osvrnuo na izazove i perspektive u razvoju tržišta kapitala. Naveo je kako su dostignuti stupanj razvoja, stečena iskustva, povjerenje ulagača u SASE i BLSE dobar temelj za daljnji razvoj, jednako kao što su značajne i regionalna suradnja i pozitivna percepcija inozemnih ulagača. Također, potencijalni i domaći i strani ulagači postoje. Ali, potrebno ih je zainteresirati i privući dobrim projektima, te promoviranjem i ohrabriranjem iskorištavanja prednosti tržišta kapitala. U tome će od pomoći biti i pozitivna prva iskustva u vezi s izdavanjem obveznica i IPO dionica.

Jako važan čimbenik u privlačenju kapitala je i smanjenje razine rizika ulaganja u jačanjem ugleda i rejtinga BiH, a kako bi se postigla pozitivna percepcija kod inozemnih ulagača.

Igor Soldo, viši stručni suradnik za odnose s javnošću



Viceguverner Božić je kao pozitivan primjer u BiH istakao CBBiH, koja je svojim djelovanjem pokazala kako postoji prostor za približavanje europskim standardima u svim segmentima, pa i na području razvoja tržišta kapitala, zbog čega svi koji u tome sudjeluju trebaju uložiti napore u cilju otklanjanja prepreka.

«Mi smo uspješno završili projekt suradnje sa Europskim sustavom središnjih banaka i time pokazali da svatko pojedinačno ima što uraditi. Cilj projekta bio je postizanje standarda europskih središnjih banaka u oblasti za koju smo nadležni i prije formalnog približavanja EU», rekao je viceguverner Božić.

VICEGUVERNERKE KOLOBARIĆ I IMAMOVIĆ NA SASTANKU KLUBA GUVERNERA

U Kapadokiji (Turska), od 7. do 9. oktobra 2011. godine održan je 26. sastanak Kluba guvernera centralnih banaka centralne Azije, regiona Crnog mora i balkanskih zemalja kojem su, u ime Centralne banke Bosne i Hercegovine (CBBiH), prisustvovala viceguvernerke mr Ankica Kolobarić i Feriha Imamović.

Sastanak je bio posvećen ključnim rizicima za stabilnost i izazovima monetarne politike. Događaj je primarno uključivao predstavljanje iskustava zemalja članica u obla-

stima bankarstva i finansijskog sektora, kao i informacije u vezi globalizacije. Predviđene diskusije su bile usmjerene na jačanje regionalne saradnje između monetarnih vlasti.

Sastanci Kluba guvernera centralnih banaka centralne Azije, regiona Crnog mora i balkanskih zemalja tradicionalno se organizuju dva puta godišnje, a centralne teme skupova se odnose na očuvanje finansijske stabilnosti u regionu.

Zijada Kovač, koordinator Službe za odnose sa javnošću

RAST ŠTEDNJE UPRKOS TEŠKOJ EKONOMSKOJ SITUACIJI

Uprkos teškoj ekonomskoj situaciji i finansijskoj krizi, u BiH je tokom ove godine zabilježen rast depozita stanovništva od 6,1%.

«Svjetski dan štednje je dan kada se trebamo podsjetiti na važnost štednje, uz nadu da će građani u BiH u budućnosti imati više motiva za obilježavanje ovog dana», izjavio je guverner Centralne banke Bosne i Hercegovine (CBBiH) dr Kemal Kozarić povodom Svjetskog dana štednje, koji se obilježava 31. oktobra.

Prema podacima CBBiH, na kraju septembra 2011. godine, ukupni depoziti stanovništva kod komercijalnih banaka u BiH iznosili su 6,88 milijardi KM i u poređenju sa stanjem na kraju decembra 2010. godine veći su za 393,3 miliona KM ili 6,1%, a u poređenju sa stanjem na kraju septembra prošle godine veći su za 721 milion KM ili 11,7%.

Depoziti stanovništva učestvuju sa 53,7% u ukupnim depozitima svih domaćih institucionalnih sektora kod komercijalnih banaka u BiH.

Od ukupnih depozita stanovništva, depoziti po viđenju čine 2,73 milijarde KM ili 39,7%, dok oročeni i štedni depoziti iznose 4,15 milijardi KM ili 60,3%.

U pogledu valutne strukture, depoziti stanovništva u KM valuti iznose 2,31 milijardu KM ili 33,6%, depoziti u euro valuti iznose 4,10 milijardi KM ili 59,6%, a depoziti u ostalim stranim valutama oko 470 miliona KM ili 6,8%.

Zijada Kovač, koordinator Službe za odnose sa javnošću

S OSNOVCIMA OBILJEŽEN SVJETSKI DAN ŠTEDNJE



Povodom 31. oktobra, koji se obilježava kao Svjetski dan štednje, Centralnu banku Bosne i Hercegovine (CBBiH) posjetili su učenici osnovnih škola «Kovačići», «Musa Ćazim Ćatić», «Isak Samokovlija» i «Katoličkog školskog centra Sveti Josip».

Oko 120 učenika je uživalo u prigodnom programu – predstavi koju su za njih pripremili Mladen Jeličić Troka i Mirela Lambić. Po završetku predstave, učenici su na poklon dobili kasicu, kalendar i milenijski set kovanica KM, te uz kolače i sok zadovoljni napustili Banku. Tako je CBBiH, doduše na skroman način, nastavila s obilježavanjem Svjetskog dana štednje koje je započela prije nekoliko godina.

Senad Hadžiomerović, koordinator Službe za socijalna pitanja i pogodnosti službenika



CBBiH ČLANICA INTERNACIONALNE KORISNIČKE GRUPE SISTEMA ZA PRERADU NOVČANICA

Internacionalna korisnička grupa sistema za preradu novčanica (BPS International Users Group) je organizacija nastala kao grupa sačinjena od centralnih banaka pet zemalja, Belgije, Njemačke, Mađarske, Turske i SAD-a s ciljem rješavanja zajedničkih problema koji su vezani za software i rezervne dijelove sistema za preradu novčanica (BPS – Banknote Processing Systems). Od osnivanja 1994. godine, BPS IUG je kontinuirano širila svoju zajednicu koja danas ima više od 30 institucija, uglavnom centralnih banaka i državnih štamparija novca. IUG članovi razmjenjuju informacije o svojim strategijama i zajedničkim pitanjima u vezi sa štampanjem, distribucijom i preradom novca.

U okviru BPS IUG, počekom oktobra 2011. godine u Budimpešti je održan je 31. sastanak Tehničke savjetodavne grupe (TAG - Technical Advisory Group). Domaćin ovogodišnjeg TAG sastanka bila je Centralna banka Mađarske, a u njegovom radu je učestvovalo više od 40 predstavnika iz 16 centralnih banaka svijeta, te predstavnici kompanije Giesecke & Devrient.

Teme ovog TAG-a su bile «Kvalitet novčanica» i «Održavanje i servis BPS opreme». Predstavnici centralnih banaka su prezentirali načine inspekcije kvaliteta novčanica i kriterije sortiranja novčanica. U okviru radnih grupa, učesnici su predložili svoje ideje i rješenja koje će članovi BPS IUG prezentirati kompaniji Giesecke & Devrient. Grupa, u čijem radu je učestvovao i predstavnik CBBiH, predložila je sljedeće:

- Povećanje kapaciteta singlera
- Daljinsko upravljanje i kontrolu mašina
- Bolji izvještaji za analizu (da podaci iz senzora budu uključeni u redovne izvještaje ili u elektronskom obliku)
- Standardizaciju dijelova koji se koriste na M7 – BPS1000 i C4 – BPS200 mašinama
- Bolju edukaciju operatera, servisera i inženjera kroz video treninge i obuku.

Domaćini, predstavnici Centralne banke Mađarske, organizovali su obilazak centra za preradu novčanica koji je izgrađen 2008. godine. Ovaj centar karakteriše visok nivo sigurnosti, te automatizacija sistema prerade, transporta, skladištenja i uništavanja novca..

Mirza Mehanović, viši stručni saradnik za održavanje sistema trezorskih mašina

